

REJIMENTU ASEMBLEIA JERÁL
ASOSIASAUN SAÚDE BA EMA HOTU (SABEH)

KAPÍTULU I
ASEMBLEIA JERÁL

ARTIGO 1.º

Natureza

Asembleia Jerál mak konstituida husi asoiadu fundadór, kolaboradór no kolaboradór sénior sira hotu, ema singular, ho plenu gozu ba diretu sosiál no tuir fin sira ne'ebé determina ona iha lei, estatutu no regulamentu internu.

ARTIGO 2.º

Kompeténsia sira

Asembleia Jerál, tuir Estatutu no Regulamentu Internu SABEH nian, bele delibera kona-ba asuntu hotu-hotu ne'ebé, tuir lei ka estatutu sira, la sai hanesan kompeténsia eksklusiva husi órgaun seluk husi Asosiasaun, dezinadamente:

- a) Nomea no destitui (troka) titulár husi órgaun sosiál sira;
- b) Apresia no aprova relatóriu no konta findu-anu nian, ne'ebé akompañadu ho pareser husi Konsellu Fiskal;
- c) Aprova liña jerál sira Planu Atividade no Orsamentu tinan oin nian;
- d) Aprova alterasaun Estatutu;
- e) Aprova extinsaun no destinu patrimóniu sosiál asosiasaun nian;
- f) Aprova regulamentu internu asosiasaun nian;
- g) Aprova alterasaun rejimentu ida ne'e;
- h) Aprova pagamentu kuota husi asoiadu sira, nune'e mos ba ninia montante no periodisidade;
- i) Delibera kona-ba aplikasaun sansaun dixiplinar espulsaun (infrasaun boot/grave liu);
- j) Aprova readmisaun husi asoiadu sira ne'ébe ekluidu tuir alínea c) husi artigu 8.º husi Regulamentu Internu;

- k) Delibera kona-ba remunerasaun ne'ebé atribui ba exersísiu ba kada kargu iha órgaun sosiál, hanesan mos momentu ne'ebé ezersísiu husi referidu kargu pasa hodi hetan remunerasaun;
- l) Aprova rekoñesimentu kualidade husi asosiadu kolaboradór seniór no asosiadu beneméritu sira;
- m) Aprova manuál boa prátika iha jestaun adjudikasaun bens no servisu, liuhusi proposta ne'ebé apresenta husi Konsellu Administrasaun.

KAPÍTULU II

MEMBRU ASEMBLEIA NIAN

ARTIGO 3.º

Verifikasaun ba kualidade sósiu sira

1. Kompete ba Meza Assembleia Jerál hodi halo verifikasaun ba kualidade husi sósiu sira hodi partisipa iha Assembleia Jerál.
2. Kualkér membru husi Assembleia Jerál bele rekere, iha ínisiu ka durante servisu, halo verifikasaun kualidade sósiu nian ba ema ne'ebé la koñese no ne'ebé partisipa ka pretende atu partisipa iha servisu Assembleia Jerál nian.

ARTIGO 4.º

Direitu membru Assembleia nian

Sai hanesan direitu membru Assembleia Jerál:

- a) Apresenta projetu, mosaun, rekerimentu, proposta, rekomendasaun no sujestaun;
- b) Solisita informasaun no esklaresimentu kona-ba atividade asosiativa nian;
- c) Apresenta protestu;
- d) Interpela meza;
- e) Propor alterasaun ba Rejimentu;
- f) Partisipa iha diskusaun, vota no halo deklarasaun votu nian;
- g) Rekore ba Assembleia kona-ba deliberasaun meza nian ka desizaun Prezidente nian, nune'e mos formula reklamasaun.

ARTIGO 5.º

Dever Membru Assembleia nian

1. Sai hanesan dever membru Assembleia Jerál nian:
 - a) Komparase iha seksaun Assembleia nian;
 - b) Partisipa iha votasaun sira;
 - c) Respeita dignidade Assembleia no ninia membru sira;
 - d) Observa orden no dixiplina ne'ebé fixa iha Rejimentu no obedese autoridade Meza Assembleia;
 - e) Kontribui ba efikásia no prestíjiu servisu Assembleia nian;
2. Laiha membru ida mak bele vota ba matéria sira ne'ebé mak iha konflitu interese entre asosiasaun no nia-aan ka nia-família até grau daruak husi liña reta (avó ka bei-oan sira) ka grau datoluk husi liña kolateral (primu-direitu, primu-irmaun).

ARTIGO 6.º

Rekerimentu sira

1. Konsidera hanesan rekerimentu pedidu sira ne'ebé diriji ba iha meza tuir prosesu apresentasaun, diskusaun no votasaun ba kualkér asuntu ka funsionamentu servisu Assembleia nian.
2. Rekerimentu sira mak formuladu ho forma eskrita no sei lee imediatamente iha Meza.
3. Kualkér rekerimentu ne'ebé admitidu mak sei koloka imediatamente ba votasaun sein halo diskusaun.
4. Votasaun ba rekerimentu mak halo liuhusi orden ba ninia apresentasaun.
5. Rekerimentu sira mak halo liuhusi votasaun afavor ka kontra, no abstensaun mak la admitidu.
6. Laiha fatin ba deklarasaun votu kona-ba rekerimentu sira.

ARTIGO 7.º

Protestu sira

1. Membru Assembleia bele halo protestu relasiona ho kualkér intervensaun, ba defeza ba onra, konsiderasaun ka naran di'ak.
2. Intervensaun ne'ebé hanesan permite de'it ba protestu ida ba ema ida.

3. Tempu ba protestu mak minutu 2.
4. La admite protestu pedidu esklaresimentu no nia respetiva resposta, hanesan mos ba deklarasaun votu nian.

ARTIGO 8.º

Pedidu Esklaresimentu

1. Pedidu esklaresimentu tenke limita ba formulasaun sintética husi pergunta nian bazeia ba matéria-em-dúvida ne'ebé mak enunsiada husi oradór ne'ebé mak akaba halo (foin halo hotu) nia-intevensaun.
2. Membru ne'ebé hakarak formula pedidu esklaresimentu tenke inskrevi iha termu intervensaun ne'ebé husu, depois mak sei formula no responde tuir orden inskrisaun nian.
3. Oradór interrogante no oradór respondente iha minutu rua ba kada intervensaun, labele, resposta hotu-hotu, liu fali ka exede minutu sanulu (10).

ARTIGO 9.º

Interpelsaun ba Meza

1. Membru assembleia bele interpela meza kuando iha dúvida kona-ba desizaun meza nian ka kona-ba orientasaun servisu sira.
2. Membru Assembleia ne'ebé husu atu hato'o liafuan hodi invoka infrasaun ba Rejimentu tenke indika norma infrinjida, ho konsiderasaun estritamente indispensável ba ninia efeito.
3. Laiha fatin ba justifikasaun ka diskusaun ba pergunta sira ne'ebé diriji ba meza.
4. Uzu-palavra hodi interpela Meza labele liuhusi minutu rua.

ARTIGO 10.º

Deklarasaun Votu nian

1. Kualkér membru Assembleia iha direitu atu expresa, iha final ba kada votasaun, deklarasaun votu ida ne'ebé mak nia durasaun labele naruk liu minutu rua.
2. Deklarasaun votu sira mak hakerek bele entrega ba iha Meza to'o asinatura ata reuniaun nian.

3. Liutia votasaun sekreta laiha fatin ba deklarasaun votu.

ARTIGO 11.º

Rekursu

1. Kualkér membru bele rekore ba Assembleia ba desizaun Prezidente ka Meza nian.
2. Kada rekorente ida bele uza palavra/liafuan hodi fundamenta rekursu ho tempu la naruk liu minutu rua.
3. Iha rekursu, laiha fatin ba deklarasaun votu.

KAPÍTULU III

MEZA ASEMBLEIA NIAN

ARTIGO 12.º

Kompozisaun no Konstituisaun Meza

1. Meza Assembleia Jerál mak komposta husi Presidente, Vise-Prezidente no Vogál ida.
2. Meza Assembleia mak eleita ba perídu tinan tolu.
3. Liutia eleisaun, no depois hetan proklamasan ba rezultadu eleitorál nian, Meza eleita imediatu ninia kompeténsia legál no estatutária sira.

ARTIGO 13.º

Substituisaun ba membru Meza nian

1. Prezidente mak hetan substituisaun, iha/ba ninia falta ka impedimentu sira, husi vise-presidente.
2. Bainhira meza mak inkompleta tanba falta simultánea ba membru meza nian, Prezidente ka ida ne'ebé mak substitui nia bele bolu membru husi Assembleia hodi integra iha Meza, desdeke hetan ema-ne'e konkorda.
3. Iha auzénsia membru Meza nian, Assembleia sei hili liuhusi votu sekretu Meza "Ad Hoc" ida hodi prezide servisu husi reuniaun Assembleia nian.

ARTIGO 14.º

Kompeténsia Meza nian

Kompete ba Meza Assembleia Jerál:

- a) Prezide no fiskaliza aktu eleitorál;
- b) Verifika elejibilidade ba kualkér asosiadu kandidatu;
- c) Apura rezultadu husi votasaun nian;
- d) Desidi kona-ba protestu no reklamasau kona-ba aktu eleitoral sira;
- e) Verifika kualidade sósiu husi partisipante iha reuniaun sira;
- f) Apresia no difere pedidu ezonerasaun husi Prezidente Konsellu Administrasaun;
- g) Solisita konvokasaun reuniaun Konsellu Administrasaun ka Konsellu Fiskál, haree mos karik julga hanesan nesesáriu, matéria ne'ebé sai hanesan kompetésia Assembleia Jerál nian;
- h) Admiti iniciativa ka aktu membru Assembleia no rejeita hirak ne'ebé konsidera violadór ba Lei, Estatutu no Reglamentu Internu;
- i) Desidi kestaun interpretasaun no integrasaun lakuna husi Rejimentu.

ARTIGO 15.º

Kompeténsia Prezidente nian

Kompete ba Prezidente Meza Assembleia Jerál:

- a) Representa Assembleia;
- b) Konvoka eleisaun ba órgaun Asosiasaun nian;
- c) Verifika regularidade kandidatura sira ba órgaun Asosiasaun nian;
- d) Fó pose ba asosiadu elitu sira iha prazu másimu loron hitu depois eleisaun;
- e) Konvoka reuniaun ordinária no extraordinária Assembleia Jerál no estabese Orden Traballu nian;
- f) Prezidi reuniaun, deklara abertura, suspensaun no enseramentu no diriji servisu tuir Orden Traballu no dispozisaun sira tuir Rejimentu;
- g) Asina ata reuniaun nian no expediente Meza nian;
- h) Mantein orden no dixiplina iha Assembleia, adota medida ne'ebé conveniente liu;
- i) Propor admisaun no tau iha diskusaun no votasaun, proposta, mosaun no rekomendasau admitida sira, no submete mos ba votasaun rekerimentu sira ne'ebé apresenta;
- j) Desidi kona-ba protestu no reklamasau;
- k) Ezerse votu kualidade iha kazu empate iha votasaun sira;

- l) Fó koñesimentu ba Assembleia mensajen hotu-hotu, infomasaun, dokumentu no expediente ne'ebé simu, presta mos esklaresimentu ne'ebé solisita;
- m) Konsede palavra/liafaun no asegura orden no diskusaun;
- n) Fó/ halo seguimentu ba insiativa Assembleia nian hotu-hotu no asina dokumentu ne'ebé sei expede;
- o) Promove publicidade ba deliberaun Assembleia nian;
- p) Ratifika substituisaun efetuada ba órgaun Asosiasaun nian;
- q) Homologa, lori Assembleia nia naran, regulamentu ba órgaun Asosiasaun nian;
- r) Ezerse kompeténsia sira seluk ne'ebé atribuída iha Lei, Estatutu, Regulamentu Internu no husi Assembleia.

ARTIGO 16.º

Kompeténsia Vise-prezidente

Kompete ba Vise-Prezidente:

- a) Auxilia no apoia Presidente iha ezersísiu ba nia funsaun sira;
- b) Substitui Presidente, iha nia falta ka impedimentu ruma.

ARTIGO 17.º

Kompeténsia Vogál nian

Kompete ba Vogál:

- a) Prepara, expede no publika konvokatória Assembleia Jerál nian;
- b) Asegura exediente (períudu traballu nian);
- c) Elabora ata reuniaun nian;
- d) Auxilia no apoia Presidente iha ezersísiu ba nia funsaun sira;
- e) Verifika prezensa sira iha reuniaun no rejista votasaun;
- f) Organiza inskrisaun husi membru Assembleia ne'ebé hakarak koalía (uzu-palavra);
- g) Halo leitura indispensável durante reuniaun;
- h) Asina korespondénsia sira, liuhusi delegasaun ne'ebé fó husi Presidente.

KAPÍTULU IV

FUNSIONAMENTU ASEMBLEIA NIAN

ARTIGO 18.º

Konvokasaun ba Reuniaun sira

1. Reuniaun sira mak konvokada husi Konsellu Administrasaun ka liuhusi karta asinadu, pelumenus, metade husi asoiadu fundadór ka kolaboradór sénior sira, ho antesedénsia mínima loron 8.
2. Assembleia Jerál la bele funsiona iha primeira konvokasaun sein prezensa husi, pelumenus, metade husi asoiadu sira, bele de'it funsiona ho kualkér númeru asoiadu sira iha segunda konvokasaun.

ARTIGO 19.º

Kontinuidade husi Reuniaun sira

1. Reuniaun sira la bele hetan interupsaun ka suspensa, bele halo de'it iha situasaun sira hanesan:
 - a) Intervalu;
 - b) Restabelesimentu orden no garantia ba andamentu servisu nian iha reuniaun;
2. Desizaun hodi halo interupsaun ka suspensaun reuniaun mak kompeténsia Prezidente Meza nian, bele husi nia insiativa ka proposta husi membru Assembleia sira;
3. Interupsaun ne'ebé inisia rasik husi membru sira la bele liuhusi minutu sanulu no la bele ezerse liu dala ida em relasaun ba kada pontu husi Orden Traballu (Traballu).
4. Iha kazu suspensaun reuniaun nian, Prezidente Meza Assembleia, sei marka, bainhira possível, reuniaun foun hodi retoma Ordem Traballu iha situasaun ne'ebé halo tia suspensaun.

ARTIGO 20.º

Diskusaun ba Dokumentu sira

1. Dokumentu sira sei diskuti tuir orden entrada iha Meza.
2. Orden diskusaun bele hetan alterasaun husi konsesu Assembleia, ne'ebé mak propor husi Prezidente ka husi kualkér membru sira.

ARTIGO 21.º

Uzu-palavra husi Membru Assembleia ka husi Meza

1. Palavra/liafuan sei fó tuir orden inskrisaun nian, salvu iha kazu ezersísiu direitu defeza nian.
2. Oradór labele hetan interupsaun husi ema ida sein nia konsentimentu.
3. Prezidente, sei adverte (bolu atensaun) oradór ne'ebé mak desvia objetivamente husi asuntu diskusaun ka bainhira nia-diskursu sai injuriozu ka ofensivu, bele retira mos palavra bainhira oradór presiste iha nia atitude.
4. Uza palavra ba apresentasaun mosaun, rekomendasau ka proposta limita ba indikasaun susinta/bazeia ba nia objetu.
5. Membru sira husi Meza ne'ebé mak hakrak uza palavra sei suspende ba sira nia funsaun, so bele reasumi depois konklui tia sira nia intervensaun.
6. Dispostu númeru liubá la aplika bainhira membru Assembleia intervén iha ezersísiu ba nia funsaun.

ARTIGO 22.º

Orden Traballu

1. Orden Traballu mak konstante iha konvokatória, bele diskuti de'it pontu sira ne'ebé inklui iha ne'ebá.
2. Sekuénsia material sira ne'ebé fixada iha Orden Traballu bele altera liuhusi desizaun Assembleia nian.

ARTIGO 23.º

Proibisaun ba uzu palavra no períudu votasaun nian

Anunsia tia inísiu votasaun laiha membru Assembleia ida mak bele uza palavra to'ok proklamasau rezultadu nian.

ARTIGO 24.º

Votasaun

Votasaun mak halo ho hamriik de'it ka hiit liman, salvu iha deliberasaun iha sentidu votasaun nominal ka sekreta, ne'ebé mak sei observa ba Lei, Estatutu ka Regulamentu internu.

ARTIGO 25.º

Empate iha Votasaun

1. Iha situasaun empate iha votasaun Prezidente Meza iha votu kualidade.
2. Iha situasaun balun ne'ebé Prezidente lakoi ka labele ezerse ninia votu kualidade, mak sai tia matéria foun ba diskusaun no halo votasaun fali, ekivale empate ne'e iha segunda votasaun mak rejisaun.

ARTIGO 26.º

Maioria nesésaria hodi halo deliberaun

1. Salvu dispostu legál, estatutária no regulamentár dehan oinseluk, deliberaun hotu-hotu mak foti liuhusi votu maioria absoluta husi votu asociadu ne'ebé mak presente.
2. Deliberaun kona-ba alterasaun estatutu exiji votu favorável tolu-haat (3/4) husi asociadu ne'ebé mak presente, desdeke superiór ba maioria absoluta husi asociadu hotu-hotu ho direitu votu, no sei foti iha reuniaun ne'ebé expresamente konvokada ba efeitu ho antesedénsia mínima loraon 30.
3. Aprovasaun husi deliberaun kona-ba disolusaun Asosiasaun mak rekere votu favorável tolu-haat (3/4) husi asociadu ne'ebé iha direitu ba votu, iha reuniaun expresamente konvokada ba efeitu ho antesedénsia mínima loraon 30.
4. Aprovasaun deliberaun kona-ba alterasaun ba Regulamentu Internu rekere votu favorável *dois-tercus* (2/3) husi asociadu ne'ebé mak presente, desdeke superior ba maioria absoluta husi asociadu ho diretu votu, iha reuniaun ho antesedénsia mínima loraon 30.

ARTIGO 27.º

Asisténsia no Intervensaun asociadu beneméritu sira no la'os asociadu sira

1. Reuniaun Assembleia Jerál mak pública salvu desizaun oinseluk (em kontráriu) husi Assembleia.
2. Partisipasaun iha traballu Assembleia nian mak restrita ba sósiu sira.
3. Bele, liuhusi pedidu Meza Assembleia ka ho nia konsentimentu, partisipa iha traballu,

hirak ne'ebé la'os asiadu, ho fin ida atu presta informasaun ka esklaresimentu kona-ba asuntu ba nia kompeténsia ne'ebé inkluí iha Orden Tráballu no iha utilidade ba Assembleia.

4. Bele halo intervensaun, ho konsentimentu Meza nia, asiadu beneméritu ne'ebé prezente iha reuniaun.

ARTIGO 28.º

Ata sira

1. Liutia kada reuniaun sei lavra no asina ata husi membru Meza sira.
2. Ata mak asina husi Presidente, Vise-Presidente no Vogal Meza nian bainhira konsidera efikaz, salvu própria Assembleia delibera katak ata ne'e tenke submete hodi hetan aprovasaun.
3. Ata mak, obrigatoriamente, publika iha pájina internet SABEH nian iha loron 30 depois nia respetiva aprovasaun.

KAPÍTULU V

DISPOZISAUN FINÁL

ARTIGO 29.º

Interpretasaun no Integrasaun Lakuna

Kompete ba Meza atu interpreta rejimentu tuir Lei, Estatutu no Regulamentu Internu.

ARTIGO 30.º

Entrada em vigór

Rejimentu tama iha vigor imediatamente liutia ka após nia aprovasaun husi Assembleia.